

許白雲先生文集

許白雲先生文集

四部叢刊續編集部

上海滙芬樓景印常熟  
瞿氏鐵琴銅劍樓藏明  
正統刊本原書版高二  
十一公分寬十三公分

許白雲先生文集序

吾婺道學之傳自宋東萊呂成公以  
身任其道倡鳴于南渡之後卓乎不  
可及已元有仁山金文安公以其傳  
於北山何文定公魯齋王文憲公者  
而傳之白雲許文懿公蓋北山得於  
勉齋黃氏而勉齋實出考亭朱子之

門故傳得其正粹然以道名家他如  
待制浦陽柳公侍講烏傷黃公禮部  
蘭谿吳公翰林東陽張公及國朝學  
士景濂宋公待制子充王公皆以斯  
文羽翼其道者也海內論鄉學淵源  
之懿師友繼承之篤蓋莫如吾婺而  
吾婺晚生後學一何繼承之寥寥哉

蓋嘗讀其文則亦知其道矣近吾忝  
第賢科拜憲職出巡東廣偶與方伯  
江浦張公論事之暇談及吾婺在昔  
理學之盛忽袖出許公白雲集寫本  
四卷見示且曰欲刻之未能予得之  
昕夕莊誦殆忘寢食儼乎身登其門  
聆其誨而歎親炙之罔及也因節廩

食之餘助方伯公購梓刻之庠舍以  
嘉惠來學方伯公謂予宜有序因竊  
歎曰昔許公嘗云君子之身存而其  
道之行不行者天也身亡而其書之  
傳不傳者人也夫書之傳即其道之  
行今許公身雖沒已踰百年而一旦  
賴方伯公出其遺書以行於世使來

學知所敬承豈非待其人而傳乎敢  
以此僭引諸篇端

成化二年歲次丙戌春正月既望後  
學金華陳相序



--	--	--	--	--	--	--

...

許白雲先生文集序



斯道也。堯舜禹湯文武以之相傳而  
至於周公孔孟焉。孟子沒而其傳泯  
焉。漢唐之儒若賈誼董仲舒韓昌黎  
亦庶幾乎斯道也。醇疵相間故卒未  
有接乎孟氏之傳者。歷千又餘年至  
於有宋真儒輩出如周程張朱數君

子者始有以承孟氏之絕學矣繼之  
以真西山蔡九峰胡文定之屬皆所  
以闡明斯道者也迨夫元之許魯齋  
劉靜脩吳草廬又皆篤信斯道者也  
其白雲先生則又得夫朱子之正傳  
而能大顯斯道者也先儒謂程子之  
道得朱子而復明朱子之大至許公

而益尊。夫豈不信。今觀其文。究極夫  
六經。出入乎子史。浸淫於群書。其規  
模固不出乎韓氏柳氏之文。然不樂  
聲利。則非退之。溺於功名。之可擬。操  
持節槩。則非宗元。黨比勢要。之可侔。  
脩身體道。佩仁服義。故其發之於言  
辭也。深厚而雄博。至誠而諄悉。故曰

根之茂者其實遂膏之沃者其光曄  
仁義之人其言藹如也若先生者誠  
有以任夫聖賢斯道之統緒矣先生  
之沒迄今百有餘年其所著之書見  
其傳于世也余幼時得之於祖妣王  
氏之家蓋王氏之先有諱麟者寔受  
學於先生之門故其家多存先生之

遺書焉。此蓋先生之草藁也。其手澤  
尚新。惜當時未有能編次以成帙者。  
故詩文雜亂而無統紀。簡策厯久而  
頗殘缺。余因而次第之。分為四卷。繕  
寫為集。藏之中笥。以俟他日。託之有  
力者而板行之。憶昔歐陽子得韓文  
於漢東。李氏之弊筐而甚愛之。時去

韓子蓋已二百年矣。遂以之而倡率  
學者。其後天下之士。非韓不學也。至  
於今猶然。豈不盛哉。先生之文。隱而  
復見者。而與韓無異。余得先生之文。  
愛而好之也。而與歐不殊。蓋先生之  
學識純正。則超軼於韓子。余之闇劣  
卑微。則深慙於歐公。尚何足與先生

文為之輕重哉幸知言君子倡率之  
如歐之於韓也則先生之文不患乎  
不行於世矣此余之所望也歐陽之  
記韓文曰道固有行於遠而止於近  
有忽於往而貴於今者蓋其久而愈  
明不可磨滅雖蔽於暫而終耀於無  
窮者道當然也先生是集若行則其



所以左右聖賢相傳之道者將為不  
小也先生諱謙字益之世號白雲先  
生詳見元史茲不贅言也

正統丁卯七月望金臺後學李伸序